



Inatsisartunut ilaasortaq
Aqqa Samuelsen, Inuit Ataqtigiit

§37 naapertorlugu apeqquteqaammut normu 203-2019 eqqagassaleriner- mut tunngasumut akissut

Asasara Aqqa Samuelsen

Inatsisartut suleriaasianni § 37 naapertorlugu atoqqiineq eqqagassalerinerlu pil-
lugit Naalakkersuisunut apeqquteqaateqarputit. Apeqqutitit uannut akisas-
sanngorlugit innersuunneqarput.

Brevdato: 20-06-2019
Sagsnr.: 2019 - 14186
Akt-id: 10972491

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: pan@nanoq.gl
www.naalakkersuisut.gl

1. Nunatsinni eqqakkanik atoqqiisarnermut (eqqakkanik ikuallaasarneq puiaasanillu utertitsisarneq eqqarsaatiginagit) atuisut periarfissaat atuuttut suunersut Naalakkersuisunit nassuiaatigineqarsinnaappat?

Akissut: Eqqagassalerineq kommunenit isumagineqarpoq. Kommunit
eqqagassalerinermit pilersaarusiaanni malittarisassaannilu innuttaasut
suliffeqarfiillu atuarsinnaavaat sumiiffinni ataasiakkaani eqqagassat
atoqqitassallu kommunenit qanoq passunneqartarnersut. Assersuutigalugu
kommunit tamarluinnarmik eqqagassanik assigiinngitsunik innuttaasut
suliffeqarfiillu tunniussivigisinnaasaannik tigooraasarfeqarput. Kommunit
assersuutigalugu saviminikunik, elektronikimik atortorissaarutikunik
batterikunillu iluaqutaanissamut atoqqiinissamullu nassiussuisarput.

Kommunit ilai containerinik immikkut assersuutigalugu igalaaminernik
igitsivissanik ilisisimapput. Kommuneqarfik Sermersooq kingullertigut
qassutikunik katersinermik misiliivoq taakku atoqqitassanngortinneqarlutik.
Qassutikunik atoqqiineramik kommunit allat aamma aaqqiissutissanik
assingusunik misissuileruttorput. Atoqqiineq ullumikkut aamma pisarpoq
Facebook-imi quppernerit, soorlu "Køb Salg Bytte" atorlugit, imaluunniit
atornikuerniarfennut innuttaasut tunniussisarnerisigut.

2. Eqqagassat atoqqinneqarsinnaasut nunatsinnit nunanut allanut annissuunneqartartut suuppat qanorlu annertutigippat? a. Aningaasanngorlugit nalingi ilisimaneqarpat?

Akissut: Saviminikunik elektronikimillu atortukunik ullumikkut annertunerusumik
atoqqitassanngorlugit nassiunneqartarput. Avatangiisinut navianaatillit nunani
allani passussassanngorlugit aamma nassiunneqartarput. Eqqagassanik allanik
atoqqitassanngorlugit nassiunneqarsinnaasunik kommunit misissuuartarput.

Atoqqitassanngorlugit nunanut allanut nassiunneqartartut pillugit Naalakkersuisut kisitsisaateqanngillat. Eqqagassat atoqqitassanngorlugit nassiunneqartut qanoq naleqarnerannut nunarsuarmi akigitinneqartut apeqqutaalluinnarput. Saviminikunik atoqqitassanngortitsilluni tunisinermi kommunit isertitaat saviminikunik nunanut allanut nassiussinermut aningaasartuutitut matussusiiginnapjaartarput.

3. Eqqakkanik atoqqiisarneq eqqarsaatigalugu Naalakkersuisut qanoq periuseqarniarnerlutik suullu suliniutiginiarnerlugit nassuiaateqarsinnaappat?

Akissut: Eqqagassalerinermi sanaartugassanut pilersaarut Eqqagassalerinermullu pilersaarut nutaaq tunngavigalugit Naalakkersuisut sulipput. Nuna tamakkerlugu eqqagassalerinermi nuna tamakkerlugu eqqagassanut nutaaliaasunik marlunnik ikuallaaveqalernissamik imaqartumik, taamalu nuna tamakkerlugu eqqagassat naammaginarlumik passunneqarsinnaalernissaat piviusunngortinniarlugu Naalakkersuisut kommunit suleqatigalugit aamma sulipput. Taamannak aaqqiissuteqarnikkut ikuallaavinnit kiassarnerup atorluarneqarsinnaaneramik qulakkeerineqataassaaq.


Naalakkersuisut Eqqagassalerinermut pilersaarutaat nutaaq naammassingajalerpoq. Eqqagassalerinermut pilersaarutip aningaasaqarnermut iluaqutaasumik atoqqiineq mingutsitsinnginnerulerlu sammineqarnerulerannik kinguneqarnissaa Naalakkersuisut kissaatigaat. Imaappoq, pingaarnertut eqqagassat pinaveersimatinneqassasut kiisalu eqqagassat annertunerusut atoqqinneqarsinnaassasut. Eqqagassat sinneruttut ikuallanneqarsinnaasut sapinngisamik nukissiornermut atorluarneqassapput. Eqqagassanik toqqorsineq periarfissat kingullerpaattut eqqarsaatigineqassaaq. Taamannak periuseqarneq innuttaasut suliffeqarfiillu immikkoortiterinerusariaqarnerannik najukkamilu imaluunniit nunap immikkoortuani/nunarsuarmi atoqqinneqarsinnaasunik atoqqitassanngortitsinissamik periarfissaqarluartariaqarnerannik kinguneqassaaq.

Plastikki ukiuni tulluuttuni aamma sammineqassaaq. Plastikkimik atuinikinnerulernikkut, katersuinerunikkut plastikkimillu atoqqiinerunikkut plastikkimik mingutsitsinerup annikillisinneqarnissaanut iliuusissanik aallartitsisoqassaaq. Susassaqartut assigiinngitsut peqatigalugit tamanna ingerlanneqassaaq.

4. Eqqakkanik atoqqisarnermut tunngasunik allanik Naalackersuisut paasissutissaateqarpat?

Akissut: Eqqagassat pillugit innuttaasut soqutiginninnerat namminnerlu iliuseqarnerat Naalackersuisut iluatsillugu oqariartuutigerusuppaat. Nunarput eqqiluutsuutinniarlugu innuttaasut amerlasuut ikiuupput, nuannaarutissaavorlu pinngortitatta avatangiisitalu paarilluarnissaannut soqutiginninneq annertusiartormat.

Inussiarnersumik inuulluaqqusillunga
Med venlig hilsen



Kim Kielsen

INUIT ATAQATIGIIT

Inatsisartuni



06.06.2019

Inatsisartut Suleriaasianni § 37 imm. 1 naapertorlugu Naalackersuisunut apeqquut imaattoq matumuuna saqqummiuppara.

Naalackersuisunut apeqquut:

1. Nunatsinni eqqakkanik atoqqiisarnermut (eqqakkanik ikuallaasarneq puiaasanillu utertitsisarneq eqqarsaatiginagit) atuisut periarfissaat atuuttut suunersut Naalackersuisunit nassuiaatigineqarsinnaappat?
2. Eqqagassat atoqqinneqarsinnaasut nunatsinnit nunanut allanut annissuunneqartartut suuppat qanorlu annertutigippat?
 - a) Aningaasanngorlugit nalingi ilisimaneqarpat?
3. Eqqakkanik atoqqiisarneq eqqarsaatigalugu Naalackersuisut qanoq periuseqarniarnerlutik suullu suliniutiginiarnerlugit nassuiaateqarsinnaappat?
4. Eqqakkanik atoqqiisarnermut tunngasunik allanik Naalackersuisut paasisutissaateqarpat?

(Inatsisartunut Ilaasortaq Aqqa Samuelson , Inuit Ataqatigiit)

Tunngavilersuut:

Nunatsinni eqqakkanik atoqqiisarnikkut pinngortitamik mingutsitsinnginnerunissamut periarfissat suuneri Naalackersuisut erseqqissaassutigissagaat neriutigaara. Eqqakkat assigiinngitsorpassuit, soorlu plastikkitt, pappilissat, igalaamerngit, qisumerngit il.il. atoqqinnerisigut pinngortitamut mingutsitsinnginnerunissamut nunatsinni periarfissanik annertusaanissamut Naalackersuisut qanoq suliniuteqarniarnerlutik paasisaqarfigerusunnarportaaq.

Ullut qulit suliffiusut iluanni apeqquutima akineqarnissaat piumasaraara.